

ՄԱՅԿԱՆ ԽՈՐՀՈՒՐԴԸ ՆԱՐ-ԴՈՍԻ ԿԵՐՊԱՐՆԵՐԻ
ԸՆԿԱՆՄԱՍԲ

Մահը որպես երևույթ հետաքրքրել է արվեստագետներին, որոնք փորձել են գտնել ու բացահայտել մահվան ու անմահության գաղտնիքը: Ծանոթանալով Նար-Դոսի յուրաքանչյուր երկի հետ, համոզվում ենք, որ նրա կերտած հերոսը այս կամ այն պատճառով զննում է դեպի մահ: Մեծ հոգեբանը, բազմիցս անդրադառնալով մահվան գաղափարին, հիմնավորել է այն. պատճառը հասարակությունն է, այն միջավայրն ու դաստիարակությունը, ուր ապրում է հերոսը և դժվարանում մտնել կյանքի հորձանուտ: Նարդոսյան հերոսների բնորոշմամբ մահը միակ իրականությունն է, իսկ մնացած բոլորը լոկ դատարկություն: Ըստ Տոլստոյի մահվամբ չի ավարտվում կյանքը, այլ սկիզբ է դրվում մի նոր կյանքի: Կյանքը ժամանակավոր է, մահը՝ անխուսափելի, պետք է միայն հաշտվել բնական այդ երևույթի հետ: Սրա հիմքում գուցե ընկած է հեղինակի մահվան նկատմամբ ունեցած երկյուղը, որը սահմնելի է և դժվար հաղթահարելի: «Յուրաքանչյուր մարդու բնազդների, նրա երկյուղների հիմքում ընկած է մահվան սարսափը, որը և կաթվածահար է անում նրա միտքն ու սիրտը»¹:

Ի տարբերություն Տոլստոյի, Նար-Դոսի համար մահը ոչ թե բնական երևույթ է (որովհետև նրա ոչ մի հերոս բնական մահով չի վախճանվում), այլ տառապանքից փրկվելու միջոց: Գրողի համար կարևորագույնը մարդ էակի հոգևոր ազատագրումն է: Հոգով ու խղճով ազատ մարդը կատարյալ է, իսկ եթե նկատվում է կաշկանդվածություն, այն վերածվում է բռնության, որից ազատագրվելը տարբեր մարդկանց մոտ տարբեր ձևով է հանդես գալիս: Նար-Դոսի կերտած կերպարների համար ելքը հռետեսական է, փրկությունը մահն է: «Ինքնամերժման գաղափարը կյանքի նկատմամբ ունեցած սիրո հաղթանակն է»². դա է պատճառը, որ ինքնասպանը անտարբեր է թե բռնության, թե՛ շրջապատի նկատմամբ, որի արդյունքում առաջ է գալիս հավերժ հանգստության ձգտումը: «Եթե անձի ու արտաքին աշխարհի կապի, հավասարակշռության պայմանը անհատի հարմարողականությունն է, ապա անձի ներքին եության դինամիկ կայունության աճի հետևանքով առաջա-

¹ Չ. Ֆրոյդ, Հոգեվերլուծության ներածություն, Ե., 2002, էջ 271:

² Шопенгауер, Артур, философ пессимизма, Учение Гартмана об освобождении мира через добровольное самоуничтожение, Одеса, 1897, ст. 265.

նում է արտաքին աշխարհին հարմարվելու որոշակի նշաններ»³: Եվ ինքնասպանությունը հանդես է գալիս այդ «հարմարողականությանը չհարմարվելու միջոց»: Պատճառը միայնության զգացումն է, բարոյական վարքի անկումը, կյանքի իմաստի կորստյան զգացումը, միջավայրից օտարվելը, որոնք պայմանավորված են մեծ մասամբ մարդու աշխարհըմբռնմամբ, նրա կենսահայեցողությամբ: Գրողը ստեղծել է անհատի հոգևոր աշխարհի վերարտադրման մի նոր մոդել՝ դաժան աշխարհի հետ մենակ մնացած մարդը, որը շարունակ որոնում է բացատրություն, իր վիճակի պարզաբանում, ճշմարտություն և չգտնելով դրանց պատասխանները հիասթափություն է ապրում, ընկճվում և յուրովի է գտնում այդ ամենից ազատվելու միջոցը:

Սահվան պատճառ կարող է հանդիսանալ նաև հերոսին անհայտ կյանքի նպատակը. «... Ապրեցի ամբողջ 27 տարի առանց իմանալու, թե ինչու, և այժմ գոյությունից նորեն գնում եմ դեպի անգոյություն՝ զզված և ծանծրացած այն բոլորից, ինչ որ տեսա աշխարհի կոչված այս հսկայական հիմարանոցում»⁴, գրում է Շահյանը և շեշտում, որ «բնությունը ծնում է մարդկանց իրեն նույնպես անհասկանալի նպատակով և նույն նպատակով էլ ստիպում ապրել» (411):

Բնությունը որ խաղ է խաղում մարդկանց հետ, հաստատում է նաև Իսահակյանը: Նա ևս փորձում է հասկանալ բնության ստեղծած առեղծվածը: «Բնությունը եթե մարդու համար մահ է սահմանել, ապա մահվանից առաջ նրան պետք է անգիտակցություն պարզել, մինչդեռ ... մեռնելիս չարաչար տանջանքով մեռցնում է... Չար, դաժան բնություն», «Անիծում եմ բնությունը, նզովում եմ նրան...»⁵: Գոռետես մարդկանց համար մահն է անվիճելիորեն հանդես գալիս որպես կյանքի իսկական նպատակ, և «չկա մեր գոյության մեջ մի նպատակ, բացի այն ըմբռնումից, որ ավելի լավ կլիներ, եթե ընդհանրապես չլինեինք»: Դա միակ ճշմարտությունն է, որովհետև «մենք չգիտենք ինչու ենք ապրում և ինչ ենք ուզում կյանքից: Չէ՞ որ կյանքը տառապանք է, տանջանք, որից կարելի է եզրակացնել, որ աշխարհը ստեղծել է ոչ թե աստված, ինչպես կարծում են ոմանք, այլ՝ սատանան»⁶: Փաստորեն կյանքը «կատարյալ կոմեդիա է», աչինչ ավելին (415):

Գոռետես անձանց երևակայությունը հասնում է նրան, որ կյանքում չկան հնարավոր, իրական արգունեմտներ, որոնք կազմում են «կյանքի ու կամքի»

³ Мегрбян А. А., теоретические проблемы психологии, Е., 1967, ст. 51.

⁴ Նար-Ղոս, հատոր 3-րդ, «Մահը», Ե., 1990, էջ 410. (կյտուհետև եզերը կնշվեն տեքստում):

⁵ ՉԱԹ, Իսահակյանի արխիվ, «Աստծո մասին, բնության, չարի և բարիի մասին, աշխարհի մասին, ինք. 22թ.», N 344-2, էջ 1-2:

⁶ Быховский, Мыслители прошлого, Цюпенгауер, Этика со-страдание, М., 1975, ст. 443.

հակադրությունը: եվ երբ մարդ գիտակցում է դա, կյանքը նրան թվում է նզովյալ: Չէ՞ որ «Աշխարհն էլ կամքն է», և եթե չկա կամք, չկա և կյանք: Որովհետև «կամքը իր էությանը միշտ տենչում, հագեցման ձգտում է, բայց երբեք չի հագեցնում, ուստի բովանդակ կյանքը, մեր ամբողջ գոյությունը ստանում է մի հսկայական, հավիտենական տանջանքի կերպարանք»⁷:

Չնայած Շոպենհաուերի՝ կյանքի նկատմամբ ունեցած այս պեսիմիստական հայացքներին, նա երբեք ինքնքսպանությունը ճշմարիտ որոշում չի համարում, այլ՝ «հերթական անհատական մոլորություն», բոլորովին «աննպատակ ու անիմաստ արարք», և որ «ինքնասպանությունը ընդհանուր ոչինչ չունի կյանքի մերժման իրավունքի հետ»⁸: Ըստ նրա ինքնասպանը վերջ է տալիս իր կյանքին այն բանի համար, որ դադարում է ցանկանալ, և «եթե չկա ցանկություն, տենչ, չի կարող լինել և կյանք»⁹:

Այստեղից եզրակացնենք այն, որ Նար-Ռոսի հերոսների ինքնասպանությունը կամ մոլորություն է, կամ բնավորության բնորոշ թուլություն, որը հող է պատրաստում վճռական քայլի դիմելու համար: Դրանք հոգեպես թշվառ, անգույն արարածներ են, որոնց անհարիր է արարելու, ինչ-որ բան տալու ունակությունը: Նրանք շարժվող մեռելներ են, որոնք չեն կարող սպանել աստծո կողմից ընծայած այն հոգևոր սնունդը, որով օծոված են: Ինչպես Տերտերյանն է բնորոշում, «նման բնավորության տեր մարդիկ ինքնախորասուզված են և նրանց մեջ ցավագոորեն զարգացած է ինքնասիրությունը, կասկածանքը, անձնական ուժերի վրա անվստահությունը: Սակայն, նրանք ընդունակ են ինքնասպանություն գործելու, որպես վայրէջքի կամ ինքնափրկության ճանապարհ՝ տանջանքից խուսափելու, կյանքի տաղտուկից ազատագրվելու համար»¹⁰:

Եվ պատահական չէ, որ նրանք հոգեպես նախապատրաստված են իրենց վախճանին: Թերևս դա է պատճառը չիուսահատվելու և նույնիսկ ինքնասպանությունը խիզախություն համարելու, քչերին տրված մի հատկություն, որոնք կարող են կամովի գնալ նրա գիրկը:

-«Արդ՝ ով մահից ոչ թե միայն չի վախենում, այլև ինքն է իրեն մահվան գիրկը նետում,- ամենաքաջը չէ՞», - գրում է Շահյանը իր նամակում: Ըստ նրա «Եթե կա մի բան, որ ճշմարիտ է, դա մահն է, որովհետև ճշմարիտն այն է, ինչը որ հավիտենական է, իսկ մահն է միայն, որ հավիտենական է» (415): Այստեղ խոսում է շոպենհաուերական այն միտքը, որ «ներկա աշխարհը

⁷ Կոլյն տեղում, էջ 382:

⁸ Быховский Б. Э. "Мыслители прошлого. Шопенгауер", М. 1975, стр. 12.

⁹ Быховский Б. Э. "Мыслители прошлого. Шопенгауер", М. 1975, стр. 13.

¹⁰ Ա. Տերտերյան «Երկեր», Երևան, 1980, էջ 111:

լավագույնը չէ և միայն հավիտենական տանջանք է, ուրեմն պետք է ժխտել այն»¹¹: Այդ մարդկանց բնորոշ շերտերից մեկը դառնում է «ամեն ինչ հիվանդագին սրվածությամբ տեսնելու և ընկալելու փաստը, ամեն մի մանրուքի ինքնակեղեք կասկածանքով վերաբերվելու հիվանդությունը», բայց «Նրանք շատ ուժեղ են որպես երագող» և «շուտ տպավորվող են»¹²:

Նրանք երես են դարձրել արտաքին իրականությունից, և ավելի լավ գիտեն ներքին իրականությունը, որովետև խորասուզվելով «իրենք իրենց մեջ»՝ ավելի լավ են ճանաչում թե իրենց, և թե դիմացինին: Դրանով է պայմանավորված նրանց մեկուսացումը, երկար ժամանակ տրամադրելը ինքնաուսումնասիրմանն ու ինքնադատապարտմանը, նաև այն, որ չկարողանալով հաշտվել իրականության հետ, չշարժվելով նրա թելադրանքով խորթանում ու կտրվում են շրջապատից: Օրինակ, Շահյանը խուսափում էր ծանոթների հետ հանդիպելուց, վախենում, որ ի հայտ կգա իր «մտավոր սնանկությունը», այդ իսկ պատճառով խույս էր տալիս ու փախչում: Նա գիտակցում էր իր «ավելորդությունը», և այդ մտորումն է, որ նրան մղում է մահվան գիրկը: Այդ մղումը ծագում է անձի հոգեկան ընկճվածության փուլում, որպես մեկամաղձության, տվյալտանքի արտահայտում: Ռեալիստական վեպի հերոսը հանդես է գալիս անհատի զգացողությունների, ինքնագիտակցման գրգիռների արտահայտության ձևով, անհատ, որ օտարված է հասարակությունից: «Նա հասարակական հարաբերությունների մեջ իր գոյությունը գիտակցող անհատն է, և տիպականի մեջ գծագրում է նաև սոցիալականը»¹³:

Շահյանին տանջում է սեփական ապիկարության գիտակցումը և անընդատ անձնաքննությունները կրծում են նրա սիրտը: Գրողն էլ մի կողմից է դատափետում իր հերոսին՝ «Շահյանը տղամարդ չէր և չուներ տղամարդի արժանապատվություն», կամ՝ «Բարոյական մի թեթև հարվածով այդ երկու աղջիկը տեղից շարժել էին անշարժության մեջ փտած երիտասարդին, ցնդել նրա թմրած ուղեղը...»:

Վեպի սկզբնական տարբերակում կարծես թե հեղինակը այնքան էլ չի քարկոծում իր հերոսին, մինչդեռ հետո հենց սկզբի էջերից զգացվում է նրա կծու ակնարկը. «...Կարծես գատկի գառը լինիս», «Շահյանը... ոչխարի աչքերով մի անգամ միայն նայեց նրան»:

Լևոնը մատնված էր մենակության, ինքնադատապարտման և կյանքը նրա համար անբովանդակ ու անիմաստ դատարկություն էր: Խզված էր կապը նրա և աշխարհի միջև, և ակնկալելի էր նրա հետագա որոշումը: Եթե նույնիսկ

¹¹ А. Шоленгауер "Мир как воля и представление", Минск, 1998, стр. 440.

¹² Վ. Սաֆարյան, Գրողի և կերպարի անհատականությունը, Ե., 2001, էջ 215:

¹³ Ս. Սարինյան, Հայոց գրականության երկու դարը, Ե., 1988, էջ 264:

առժամ կանխելին նրա վճիռը, այնուհանդերձ, նա ի վերջո կդիմեր այդ քայլին, որովետև նման բնավորությունները ունակ չեն հաղթահարել սեփական ինքնասիրությունը, երկմտանքը, և որքան ապրեր, այնքան կխորանար իր ոչնչության գիտակցության մեջ: Չհուսահատվելու ու չտառապելու համար անհրաժեշտ էր «ակտիվ գործունեություն ու ստեղծագործական ուժ», որը բացակայում է այս հերոսի մեջ: «Ստեղծագործությունն է կազմում մարդու իմաստը, նրա էության բուն հիմքը: Եվ երբ մարդ հասնում է իր հոգու այդ խորունկ գիտակցության, նա այրվում է ապրել տենչալու կրակով»¹⁴: Միայն պառկել, երևակայել-սա չի նշանակում ապրել. արդեն իսկ նրա գոյությունը անգոյություն է, և «մեկից դեպի մյուսը մի քայլ է» (Կամյու):

Ելնելով հոգեբանական շարժառիթներից, կյանքի ընթացումից, զգացողությունից, կարող ենք ասել, որ Շահյանի կենսահայեցողությունը հոռետեսական է: Նրա էությունը պայմանավորված է կամազրկությամբ, անվճռակա-նությամբ: Նա անկարող է որևէ գործի ձեռնամուխ լինել: Մի անգամ փորձում է զբաղվել, տրվել աշխատանքի՝ թարգմանություն է անում հոռետես փիլիսոփաներից, բայց Մինասյանի մի ակնարկը բոլորովին թևաթափ է անում նրան: Ինչ կարելի է սպասել մի մարդուց, որը չունի համարձակություն՝ ընդունել կնոջ հրավերը և գնալ նրա տուն, որը «...այնքան սարսափեցնում էր նրա վախկոտ կամքը», չնայած, որ «ցանկալի էր նրա վավաշուտ երևակայության համար» (306): Եթե նրա մոտ «մի բան» ստացվում էր, ապա միայն երազանքներում՝ երևակայական համարձակությամբ: Երբ մարդու մղումներն ու հակումները սկսում են ներհակվել իրար և անհատը անկարող է իշխել դրանց վրա, սկսվում է ներքին պատերազմը, որից մարդ դառնում է ջղային, հետզհետե խորասուզվելով ինքն իր մեջ՝ հիստերիկայի գիրկն է նետվում: Եվ ցավալին այն է, որ չի կարող ազատվել առաջ եկած մաղձից և եթե հաջողվում է աստված մի արասցե. անմիջապես վեր է խոյանում նրա արժանապատվության հիվանդագին հարցը: Շահյանի օրինակով մենք համոզվում ենք դրանում. Շահյանը տանը բռնակալ էր, իսկ դրսում խեղճացած մի երեխա, որ վախենում էր շփվել, խոսել, նույնիսկ բարևել մարդկանց: Սակայն ազդվելով դրանից, զգալով իր խեղճությունը, իր անբողջ մաղձը թափում էր տանը ծնողների վրա, նրանց գլխին դառնալով «կատարյալ պատիժ»: «Նա լացացնում էր հորն ու մորը և կարծես, մխթաբովում էր նրանց արտասուքով»: Այդ զգացումը շուտով փոխարինվում էր խոր մելամաղձությամբ: «Այդ այն զարհուրելի մելամաղձությունն էր, որի ժամանակ մարդու հոգին կաշկանդվում է, միտքը թմրում, զգացմունքները բթանում,

¹⁴ Ֆրանզյան «Նիցշե և նրա փիլիսոփայությունը», Թիֆլիս, Յերմես, 1910, էջ 87:

աշխարհը մութ է թվում, կյանքն՝ անտանելի, մահը՝ ցանկալի»(74): Մահվան գիրկը բոլորն են գնալու՝ ոմանք անհոգ կամ մտատանջ, մի մասը տխրելով ու մորմոքելով, մյուսները՝ ժպիտով ու գոհունակությամբ: Եվ որքան շուտ ազատվես կյանք կոչված դժոխքից, այնքան շուտ կգտնես հոգու անդորրություն: սա է նրա փիլիսոփայությունը:

Իր անլիարժեքության տվայտանքը և միայնության ուրվականը իմաստագերծ են անում նրա գոյությունը, որի համար էլ մահը գերադասում է կյանքից: Օտարվածությունը, ինքնաժխտման տառապանքի զգացումը դրդում են ինքնասպանության, ուր երևում է նրա հոգեկան արծագանքը, բողբոջ, միջավայրի դեմ: Այսպիսի բնավորությունների մեջ չափազանց զարգացած է նեղսրտությունը, դրան հետևող հուսահատությունը, որը մեռցնում է ցանկացած զգացմունք: Սիրո զգացումը որպես «աստվածային տուրք» նույնպես խորթ է նրանց: Առաջին հայացքից թվում է Շահյանը սիրում է Եվային, ապա՝ պանի Զդանեկչին, բայց դա լոկ հրապուրանք է, սիրահարվածություն, զուցե և երևակայական սիրո արգասիք, որը շուտով անկարողության պատճառով անհետանում է՝ տեղը զիջելով հիասթափությանը: Նման անձիք չունեն և չեն կարող ունենալ սիրելու ունակություն, որովհետև «սիրելու համար մարդու հոգին բաց պիտի լինի մի ուրիշին ընդգրկելու համար»¹⁵: Սի^ոթ^ե՝ սիրող մարդը հետ կբաշվեր՝ տեղ զիջելով իր ընկերոջը, որը բացահայտորեն սիրահետում էր իր «թվացյալ սիրած էակին»: Եզրակացությունը այն է, որ ինքնասերը լցված է միայն ինքն իր հանդեպ ունեցած սիրով և ավելին պահանջելը անիմաստ է:

Շահյանի և ընդհանրապես նրա նմանների հոռետեսական ապրումները չեն սահմանափակվում սուրյեկտիվ շրջանակներում: Դրանք վարակիչ են և առաջ են բերում համընդհանուր տրամադրություն: Շահյանի կերպարին ծանոթանալիս, ընթերցողը ընկնում է նույն մեղամաղծության գիրկը, ինչ ապրում է հերոսը, և թվում է՝ ինքն էլ նույն տիպական անձն է՝ անկարող, թույլ, կամազուրկ և այլ նման հատկություններով օժտված: Դա մասամբ պայմանավորված է նաև հոգեբանական ռեալիզմի առանձնահատկությամբ, գրողի հմտությամբ, պատկերը խորությամբ նկարագրելու ունակությամբ, նրա իրական լիցքեր հաղորդելու կարողությամբ, ինչը հաջողվում է խորատես արվեստագետին: Շահյանի կյանքը դարձել է մի բեռ, և նրա նպատակը ուղղված է մի որոշ կետի, ազատվել գոյության ճնշումից, դարձնել այդ ճնշող գոյությունը անզգալի: Սպանել ժամանակը, ազատվել ծանձրությից, որովհետև կյանքը լեցուն է ծանձրությով ու դատարկությամբ: Այն նման է «ժամացույցի

¹⁵ Ա. Տերտերյան «Երկեր», Երևան, 1980, էջ 154:

մի ճոճանակի, որ հավիտենապես ճոճում է տաճրանքի և ծանծրույթի մեջ»¹⁶: Նրա գոյությունը արդեն «ներկայի մի մշտական մահ է դեպի մեռած անցյալը: Իսկ ֆիզիկական կողմից դիտած- նա մի երկար մահ է»¹⁷: Հոգեկան այդ ալեբախումները առաջ են գալիս հուսախաբությունից, կասկածամտությունից, անվստահությունից, երջանկության անհնարելիության գիտակցումից: Իսկ ե՞րբ է մարդ երջանիկ: Երբ ինքն է ձգտում ստեղծել այդ երջանկությունը, երբ նրա մեջ վառվում է ապրելու և գործելու տենչը: Մինչդեռ մեր հերոսի կիզակետը մահն է, անշարժ ու հանգիստ վիճակը: Հետաքրքիր է մահվան ձգտող անծանց կերպարանքը, որին անդրադարձել է Նար-Դոսը: Նա հենվում է եզրիտենցիալիզմի ներկայացուցիչների արտահայտած այն մտքի վրա, որ «մարդ մահվան ժամանակ դառնում է խորհրդավոր ու տրագիկ»: Հիշենք Շահյանի կերպարը Մինասյանի նկարագրությամբ, երբ վերջինս այցելում է նրան շնորհավորելու Նոր տարին, իսկ Լևոնը տեղյակ չէ նույնիսկ, որ իր հետև թողնում է ևս մեկ «անիմաստ, միապաղաղ» տարի: Հեղինակը այստեղ ավելի է ընդգծում նրա կտրվածությունը աշխարհից: «Շահյանը նստած էր բազկաթոռի վրա, գլուխը ետ էր ձգել բազկաթոռի թիկունքին և ոտները դրել էր առջևը գտնված մի աթոռի վրա, այնպես որ գլուխն ու ոտների ծայրերը գրեթե հավասար բարձրության վրա էին գտնվում...աչքերը...ուռած, կարմրած և պատած էին կես- կապտավուն, կես- սևագույն շրջանակներով. դեմքը գաջի գույն էր ստացել և խիստ լղարել: Մինասյանին թվում էր, թե իր առաջ տեսնում է ոչ թե Շահյանին, այլ նրա ուրվականը...»(391):

«Ինքնասպանությունը միտումնավոր կերպով կյանքից զրկել է»¹⁸, որի պատճառը բազմիցս նշած անտարբերությունն է դեպի իր շրջապատը, առիտարակ կյանքը: Նման մարդիկ պատրաստ չեն կրելու կյանքի հարվածները, ճակատագրի կնիքը: Նար-Դոսը, նկարագրելով արտաքին դրդապատճառները, դրանց ազդեցությունը անհատի հոգեկանի վրա, չի անտեսում նրա ներքին աշխարհի կառույցի շերտերը, ներհոգեկան որակները, որոնք նրանց մահվան հիմքն են հանդիսանում: Աննան թույն է խմում, չկարողանալով դիմադրել կյանքի «անակնկալներին», մահ այն ակնկալիքներին, ինչ խոստանում էր նրան կյանքը այսուհետ: Բուրժուական հասարակության մեջ դաստիարակված այդ հերոսուհուն պակասում է կամքի տոկունությունը, հաստատակամությունը, ինչը կկանխեր նրա մահը: Նյութականի քայքայումով կործանվում է անհատը՝ առանց վարանելու սեփական ձեռքով տնօրինելով իր մահը: Մշտապես շրջապատված լինելով հարուստ ու գեղեցիկ իրերով, սովոր փափկակեցության,

¹⁶ Ե. Ֆրանգյան «Պեսիմիզմի փիլիսոփան», Երևան, 1860-1910, էջ 87:

¹⁷ Ե. Ֆրանգյան «Պեսիմիզմի փիլիսոփան», Երևան, 1860-1910, էջ 89:

¹⁸ Ожегов С. И. "Словарь русского языка", Москва, 1988, стр. 568.

չքեղության, դժվար է այդ ամենից հետո կրել չքավորության հարվածները, ոչ քե ապրել, այլ՝ գոյատևել: Մի՞թե մի գրոշ արժե կյանքը, ուր միայն իշխում է տառապանքը, եթե կա միջոց փրկվելու, հոգու ազատություն գտնելու: Պարզապես պետք է նախապատրաստվել, և կգտնես անդորրը: Անճան իր անձնագրիության կատարելու մեղքը բառնում է իր ստացած դաստիարակության վրա, որը նրան օժտել է անվճռականությամբ: Կարող է նման դաստիարակություն ստացած աղջիկը հանդուրժել այդպիսի կեցությունը, կրել օրեցօր ավելացող տառապանքները, որոնք սաստկացնում են նրա ապրումները, ատելի դարձնում կյանքը. «Ա՛խ որքան ծանր է, որքան ծանր է, սիրելի քույրիկ,- գրում է Անճան իր ընկերուհուն: Այնքան ժամանակ ոչ մի ծանր վիշտ տեսած չլինելով մեր ընտանիքի մեջ, այժմ այս սոսկալի դժբախտության առաջ զգում եմ, որ հոգիս շատ հեշտությամբ է ընկճվում... Եվ կարե՞լի է միթե անվեհերությամբ դեմ գնալ ճակատագրի մի այսպիսի հարվածի»¹⁹: Այսպիսով, «կործանվում են մարդիկ, իսկ մեղավորը հասարակական հարաբերություններն են»²⁰: Ինքն իր մեջ ներփակված բնավորությունը փշրվում ու տատանվում է թեթև վարանումներից: Պատվիրատու կնոջ հանդիմանական խոսքերը, կարծես ստիպում են Անճային՝ ավելի խորը գիտակցել իր անպիտանիության մասին՝ «...Ինքս ոչի՞ նչ եմ, ոչի՞նչ, ոչի՞նչ...»,- բացականչում է Անճան, և ցավագնորեն զարգացած նույն ինքնասիրությունն է, որ նրանից խլում է այնքան օրերի տառապանքներն ու արտասուքները, երբ ստանում է ընկերուհու ուղարկած գումարը. «Կյանքիս մեջ դեռ այնպես լաց չէի եղել, արտասուքիս յուրաքանչյուր կաթիլը, կարծես թույն էր, որ քաղվում էր ուղղակի սրտիցս...»: Եվ այդ ամենը Անճան վերագրում է ճակատագրին, որը քայքայել է իր ամբողջ «բարոյական աշխարհը» և ստիպում է «հաստատուն մնալ»: Ցանկացած տրամադրություն ալեկոծում է նրա կանացի քնքուշ սիրտը, որի ժամանակ «ուզում ես աղոթել ու անիծել, ուզում ես ապրել ու մեռնել»: Տաղտկության ակունքները պետք է փնտրել անզորության ու մենակության մեջ, որին մատնել է իր անձը, որովհետև բացի ծանծրայից ինչ կարող էր զգալ ամբողջ օրը լուսամուտի առաջ նստած և «ցրտից անզորացած ճանճերին» սաստկացնող անձնավորությունը: Նորից նույն շահյանական տիպը, ինչպես բնութագրում է Տերտերյանը, որը դարձել է «եղեգն շարժուն ի հողմո»²¹: Անճայի ինքնասպանությունը չի զարնացնում, որովհետև հեղինակը տրամաբանական շերտերով զարգացնելով հերոսուհու ներքնաաշխարհը, այն բացում է ընթերցողի առաջ, իսկ վերջինս էլ

¹⁹ Նար-Ղոս «Անճա Սարոյան», հ 1. , Երևան, 1990, էջ 439:

²⁰ Վ. Սաֆարյան, «Գրողի և կերպարի անհատականությունը», Երևան 2001, էջ 217:

²¹ Ա. Տերտերյան, Երկեր. , 1980, էջ 149:

ամեն ռոպե ակնկալում է նրա մահը: Նրա հոգին այնքան է լցվել դառնություններով ու տառապանքներով, որ այլևս հաղթահարելը անհնարին է: Աճնայի համոզմամբ կա համընդհանուր, անվախճան տիեզերական կեցություն, որի առջև կյանքի ու մահվան սահմանագիծը դառնում է արհեստական մի սյուն, և վերանում է ամենահզորը մարդու մեջ՝ մահվան նկատմամբ ունեցած սարսափը:

Մահվան գաղափարը մարդու մեջ պատահականորեն չի առաջանում: Նար-Ղոսի հերոսների օրինակը ևս հաստատում է, որ մահը առկա է ամծի ենթագիտակցականում, և դեպքերի բերումով՝ լինի դա միջավայրի, դաստիարակության, ճակատագրի մեղքը, այն անցնում է գիտակցական ոլորտ, որտեղ և կարող է ձեռք բերել իրագործելի բնույթ: Հետզհետե մարդը նախապատրաստվում է իր անկմանը, դրա համար էլ հեշտությամբ կայացնում է իր վճիռը:

Մինչև Շահյանի ինքնասպանությունը, ընթերցողը նկատում է դեպի մահ ձգտող անհատի հոգեվիճակը: Երբ նա վերադառնում է պարահանդեսից, անցնում է կանուրջի վրայով և հրապուրվելով ալիքներով՝ արագ հետ է քաշվում ուղեղում ծագած մտքից խուլյս տալու համար: «Ոչինչ չկա, ոչ մի հիմնավոր բան, որից կարողանայի ամուր կպչել՝ չանհետանալու համար, - բացականչում է մեկ այլ երկի հերոսուհին»²²: Հետևաբար, կյանքի ու մահվան բնագոյը փոխկապակցված են, և կարևորն այն է, թե ի վերջո որն է գերակշռում:

Ըստ էության դա հավերժ մտատանջության, տվայտանքի, հարատև մտայնությունն է՝ բնորոշ Նար-Ղոսի որոշ հերոսներին՝ մահվան հետ հաշտ վերաբերվողներին: Նրանք գիտեն թե ինչ է կյանքը, ինչ՝ մահը, դրանցից որն է իսկականը, ճշմարիտը:

Կյանք-մահ հարաբերությանը անդրադառնալով, Նար-Ղոսը հանգում է այն եզրակացության, որ բոլորովին էլ իր հերոսների համար կյանքը իմաստ չունի, իսկ մեռնելը փափագ է, հավերժություն, որովհետև այն կենսաբանական երևույթ է, որի դեմ պայքարել հնարավոր չէ, ընդհակառակը՝ որքան շուտ մեռնել, այնքան՝ լավ: Փաստի հետ գրողը ներքնապես հաշտված է, որը և ուրույն ձևով է ընկալում ու պատկերում:

²² Նար-Ղոս, հ. I, «Սպանված աղավնի», Երևան, 1990, էջ 473: